

06/1935

## Aukin þekk- ing á jarð- fræði Íslands.

Það eru orðin allmörg ár síðan eg fór að óska þess með sjálfum mér, að dr. Lauge Koch fengi áhuga á jarðfræði Íslands, og virtist heldur ekki ólíklegt að svo mundi fara, þar sem sennilegt er, að landið hafi endur fyrir löngu verið áfast við Grænland, og ýmislegt skylt í jarðfræði landanna. Eg hafði fundið, að jarðfræði Íslands er um summa hluti mjög miklu merkilegri en haldið hafði verið, og mikil þörf á, að meiri áhugi yrði á að rannsaka landið en áður hafði verið. En um dr. Lauge Koch virtist mér nokkuð líkt og Guðmundi hinum ríka um Skarphéðin, er hann kvaðst heldur vilja fylgi hans eins, en tíu annara. Það er því engin furða þó að mér þætti það góð frétt að dr. L. K. ætlaði að fara að taka þátt í rannsókn landsins, og það á miklu stórkostlegri hátt en eg hafði nokkur tíma gert mér vonir um að

verða mundi. Kom mér þá einnig í hug, að þessi nyung í rannsóknarsögu landsins gæti orðið til þess, að ýmsum þeim mönnum, sem þess eru mjög maklegir, gæfist kostur á að vinna að íslenskri jarðfræði, við talsvert rýmri ástæður en áður. Vil eg þar nefna Jóhannes Áskelsson, sem þegar hefir sýnt sig mjög mikilsverðan mann fyrir rannsókn landsins, sakir garpskapar síns og áhuga, og einnig Jakob Lindal á Lækjarmóti, er nú fyrir skömmu hefir gert nýjar athuganir norður þar, sem virðast vera stórmærkilegar og ég býst við að meira fréttist um áður langt liður. Og þá er ekki litilsvert, að efnilegum ungum mönnum eins og Guðmundi Kjartanssyni og Sigurði Þórarinssyni — svo að eg nefni aðeins þá sem mér eru nokkuð kunnugir — opnast þarna leið til fullkomnara jarðfræðináms en nokkrum íslenskum námsmanni áður.

Eg hygg að vísu að miklar hættur vofi yfir þjóð vorri, jafnvel meiri en nokkru sinni áður; vér erum í röst aldaskiftanna, og ef illa fer, hygg eg að ekki mundi líða á löngu áður íslenskri sögu yrði alveg lokið, og þá með ósköpum. En eg fæ ekki skilið, að framtíð þjóðarinnar geti staðið nokkur háski af því, að sá maður sem best er treystandi til þess á öllum Norðurlöndum, og jafnvel þó víðar væri leitað, hefir tekið að sér að hleypa meira fjöri í rannsóknir á voru merkilega landi en áður hefir verið. Mér skildist á dr. L. K. sem hann mundi ekki, þó að slíks væri leitað, fánlegur til að verja meir en 3 árum til afskifta sinna af jarðfræði Íslands, og er vonandi að hann hafi rétt fyrir sér í því, að sá skriður muni þá kominn á, að hans þurfi þar ekki framur við.

24./9.

Helgi Pjeturss.